



Bošnjačko nacionalno vijeće

Pozivajući se na Povelju Ujedinjenih nacija, Univerzalnu deklaraciju o pravima čovjeka, Međunarodni pakt o građanskim i političkim pravima, Deklaraciju Generalne skupštine UN o pravima pripadnika nacionalnih ili etničkih, vjerskih ili jezičkih manjina, Okvirnu konvenciju za zaštitu nacionalnih manjina, Evropsku povelju o manjinskim ili regionalnim jezicima, Ustav Republike Srbije, Zakon o zaštiti prava i sloboda nacionalnih manjina, Zakon o nacionalnim savjetima nacionalnih manjina i međunarodna i domaća dokumenta u oblasti zaštite ljudskih i manjinskih prava;

Imajući u vidu dvadesetpetogodišnji rad i kontinuitet Bošnjačkog nacionalnog vijeća u legitimnom zastupanju i predstavljanju interesa Bošnjaka;

Konstatujući neriješen status i položaj Bošnjaka i Sandžaka u Republici Srbiji;

Polazeći od činjenice da suverenost potiče od građana, a da su Bošnjaci kao građani Republike Srbije nosioci njene suverenosti;

Čvrsto opredijeljeno za demokratiju, evropske i evroatlantske integracije Srbije i izgradnju Srbije kao države zasnovane na temeljima vladavine prava, pravne sigurnosti, jednakosti pred zakonom, regionalizovane i decentralizovane;

Ističući da bošnjačko jedinstvo nema alternativu;

Bošnjačko nacionalno vijeće, kao najviše predstavničko tijelo Bošnjaka u Republici Srbiji, izdaje sljedeći

PROGLAS

Pozivamo sve bošnjačke političke stranke, bošnjačke nacionalne institucije i organizacije da formiraju zajednički bošnjački blok radi jedinstvenog učešća na predstojećim opštim izborima u Republici Srbiji.

Pozivamo sve bošnjačke političke stranke, bošnjačke nacionalne institucije i organizacije da svoj zajednički nastup na opštim izborima temelje na ispunjenju sljedećih ciljeva:

- zalaganju za punopravno članstvo Srbije u EU i evroatlantske organizacije;
- zalaganju za rješavanje pitanja Bošnjaka sa ciljem vraćanja statusa naroda u okviru reforme političkog sistema Republike Srbije;
- uspostavljanju autonomije Sandžaka u okviru reforme političkog sistema Republike Srbije, kao mehanizma za političku egzistenciju Bošnjaka;
- zalaganju za donošenje ustavnog (okvirnog) zakona o manjinama;
- zalaganju za usvajanje prijedloga Bošnjačkog nacionalnog vijeća za izmjenu i dopunu Akcionog plana Republike Srbije za ostvarivanje prava nacionalnih manjina;
- zalaganju za usvajanje Rezolucije o genocidu u Srebrenici u Narodnoj skupštini Republike Srbije;
- aktivnom učešću u procesu reforme političkog sistema Srbije sa ciljem izgradnje moderne evropske države;
- zalaganju za puno ostvarivanje manjinske samouprave u Republici Srbiji;
- zalaganju za nastavak realizacije programa za povratak prognanih, izbjeglih i raseljenih Bošnjaka Sandžaka i njihov održiv opstanak;
- zalaganju za rasvjetljavanje zločina počinjenih nad Bošnjacima Sandžaka i kažnjavanje njihovih počinioca;
- zalaganju za donošenje Zakona o lustraciji;
- aktivnom učešću u realizaciji Sporazuma o saradnji Bošnjačkog nacionalnog vijeća i Bošnjačkog vijeća u Crnoj Gori, potpisanog u Rožajama 23. 01. 2016. godine;
- zalaganju za preduzimanje konkretnih i efikasnih mjera države za poboljšanje kvaliteta života u Sandžaku i ekonomskog razvoja Sandžaka;
- zalaganju za slobodne, fer i demokratske izbore;
- ažuriranju biračkih spiskova i stavljanje na uvid građanima tokom izbornog procesa;
- ravnopravnom korištenju državnih resursa za sve učesnike izbora;
- kontroli rada i sprečavanju zloupotrebe tokom izbornog procesa: republičkih inspekcija, MUP-a, Ministarstva za rad i socijalna pitanja, Ministarstva poljoprivrede i Ministarstva finansija;

Bošnjaci, podržite bošnjačko jedinstvo i kulturu dijaloga, odbacite stranke i pojedince koji šire govor mržnje, klevete, laži i uvrede i sve drugo što unosi nemir u Vaša srca i Vaše domove.

Učinimo sve da izbori budu svečanost, a glasanje na izborima svečani čin.

Bošnjačko nacionalno vijeće Vam želi sretnu sadašnjost i sigurnu budućnost.

*U Novom Pazaru
29. januar 2016. godine*